

辰、澧州、江陵府、興國臨江軍。有「仙芝」、「玉津」、「先春」、「綠芽」之類二十六等。兩浙及宣、江、鼎州。又以上中下。或第一至第五爲號。「散茶」出淮南、歸州、江南、荆湖。有「龍溪」、「雨前」、「雨後」之類十一等。江浙又有以上中下。或第一至第五爲號者。（宋史卷一八三食貨志下五。）

茶之產於東南者。浙東西、江東西、湖南北、福建、淮南、廣東西。路十州六十有六。縣二百四十有二。雷川、顧渚、生石上者。謂之「紫笋」。毗陵之「陽羨」。紹興之「日鑄」。婺源之「謝源」。隆興之「黃龍」。雙井。皆絕品也。……建寧臘茶。北苑爲第一。其最佳者。曰「社前」。次曰「火前」。又曰「雨前」。所以供玉食。備賜予。……大觀以後。製愈精。數愈多。胯式屢變。而品不一。……蜀茶之細者。其品視南方已下。惟廣漢之「趙坡」。合州之「水南」。峨眉之「白牙」。雅安之「蒙頂」。土人亦珍之。但所產甚微。非江建比也。（宋史卷一八四食貨志下六。）

### 「棉」

古時未有棉布。凡布皆麻爲之。記曰。治其麻絲。以爲布帛是也。木棉作布。邱文莊謂元時始入中國。……棉花布惟交廣有之。其種其法。俱未入中土。……陶九成輟耕錄。記松江烏泥涇。土田磽瘠。謀食不給。乃覓木棉種於閩廣。初無踏車椎弓之制。率用手去其子。線絃竹弧。按掉而成。其功甚艱。有黃道婆自崖州來。教以紡織。人遂大獲其利。未幾道婆卒。乃立祠祀之。三十年祠毀。鄉人趙愚軒重立云。九成元末人。當時所記立祠始末如此。益可見黃道婆之事未遠。而松江之有木棉布。實自元始也。瑯琊代醉編。又謂棉花乃番使黃始所傳。今廣

東人立祠祀之。合諸說觀之。蓋其種本來自外番。先傳於粵。繼及於閩。元初始至江南。而江南又始於松江耳。元世祖本紀。至元二十六年。置浙東、江東、江西、湖廣、福建木棉提舉司。責民歲輸木棉布十萬疋。……木棉特設專官。則其初爲民利可知。（趙翼陔餘叢考卷三〇）

### （乙）礦產

「白礬」出晉慈坊州。無爲軍。及汾州之靈石縣。「綠礬」出慈隰州。及池州之銅陵縣。（宋史卷一八五食貨志下七）

「金」產商、饒、歙、撫四州。南安軍。「銀」產鳳、建、桂陽三州。……饒、信、虔、越、衢、處、道、福、汀、漳、南劍、韶、廣、英、連、恩、春十七州。建昌、邵武、南安三軍。……秦、隴、興元三州。……「銅」產饒、處、建、英、信、汀、漳、南劍八州。南安、邵武二軍。……「鐵」產徐、兗、相三州。……河南、鳳翔、同、虢、儀、蘄、黃、袁、英九州。興國軍。……晉、磁、鳳、豐、道、渠、合、梅、陝、耀、坊、虔、汀、吉十四州。……信、鄂、連、建、南劍五州。邵武軍。……「鉛」產越、建、連、英、春、韶、衢、汀、漳、南劍十州。南安、邵武二軍。……「錫」產河南、南康、虔、道、賀、潮、循七州。南安軍。……「水銀」產秦、階、商、鳳四州。……「朱砂」產商、宜二州。（宋史卷一八五食貨志下七）

廣西諸洞產生金。洞丁皆能淘取。其碎粒如蚯蚓泥。大者如甜瓜子。故世名「瓜子金」。其碎者如麥片。則名「麩皮金」。金色深紫。比之尋常金色。復加二等。此金之絕品也。銀之品。有紋如羅甲者。有松紋者。有中窪而郭高者。皆爲精銀。其絕品則色青。故官品有金紫銀青之目。蓋金至於紫。銀至於青。爲絕品也。（周密癸辛雜

識續集下)

銅鐵鉛錫阬冶者。閩蜀湖廣江淮浙路皆有之。祖宗時。天下歲產銅七百五萬斤。鐵一百十六萬斤。鉛三百二十一萬斤。錫七十六萬斤。皆有奇。渡江後。其數日減。至紹興末。江東西、福建、廣西、湖南、潼川府、利路十四州。歲產銅二十六萬三千一百六十九兩。江東西、廣南、湖南、福建二十州。產鐵八十八萬三千二百二斤十三兩。而蜀中所產不與焉。江湖、閩廣、浙東二十州。產鉛十九萬一千二百四十斤十三兩。湖廣、四州。產錫二萬五百四十八斤六兩。視祖額。鐵才及四分餘。鉛及六釐。銅及四釐。錫及三釐。皆弱。東南鐵錫。輸岑水、鉛山、永興、興利四場。浸銅爲泉司之用。惟川鐵以鑄錢云。舊婺州銅。融福峽州南安軍鉛。贛宜州南安軍錫阬皆廢。膽銅者。蓋以鐵爲片。浸之膽水中。後數十日卽成銅。凡銅場十四。鐵場三十八。鉛場二十四。錫場五云。(李心傳建炎以來朝野雜記甲集卷一六)

## (二) 學術思想


### (1) 理學

#### (甲) 理學之起源

周子太極圖。創自河上公。乃方士修鍊之術也。……周子更爲太極圖。窮其本而反於老莊。……但綴說於圖。

而又冒爲易之太極。則不侔矣。……考河上公本圖。名無極圖。魏伯陽得之以著參同契。鍾離權得之以授呂洞賓。洞賓後與陳圖南同隱華山。而以授陳搏。陳刻之華山石壁。陳又得先天圖於麻衣道者。皆以授种放。放以授穆修與僧壽涯。修以先天圖授李挺之。挺之以授邵天叟。天叟以授子堯夫。修以無極圖授周子。周子又得先天地之偈於壽涯。其圖自下而上。以明逆則成丹之法。（黃宗義宋元學案卷一二）

至宋中葉。周敦頤出於春陵。乃得聖賢不傳之學。作太極圖說。通書。推明陰陽五行之理。命於天而性論人者。瞭若指掌。張載作西銘。又極言理一分殊之情。然後道之大原。出於天者。灼然而無疑焉。仁宗明道初年。程顥及弟頤寔生。及長受業周氏。已乃擴大其所聞。表章大學中庸二篇。與語孟並行。……融會貫通。無復餘蘊。迄宋南渡。新安朱熹得程氏正傳。其學加親切焉。大抵以格物致知爲先。明善誠身爲要。凡詩書六藝之文。與夫孔孟之遺言。顛錯於秦火。支離於漢儒。幽沉於魏晉六朝者。至是皆煥然而大明。秩然而各得其所。……邵雍高明英悟。程氏實推重之。（宋史卷四二七道學傳序。）



按理學有表裏二端。以儒家爲表。而以釋道爲裏。儒家自漢學瑣碎。六朝空虛以後。

孔孟之道。已若存若亡。自王通韓愈論道論性。其義稍彰。宋儒繼之。究心修己治平之道。起於人倫。終於萬物。舍傳注而言經。以疑古爲翻案。此其表也。論其裏。則混合禪宗及參同契之說。以言心言性。由致知格物而歸本於太極無極。標舉主敬主靜之說。以爲爲學之方。冶儒釋道爲一爐。集中國印度思想之大成。自宋迄清。理學之思想規律。深入社會人心。關係近代人倫治道。實非淺鮮。

## (乙) 理學派別

周敦頤字茂叔。道州湖南營道人。……家廬山蓮花峯下。前有溪。合於湓江。取營道所居濂溪以名之。……博學力行。著太極圖。明天理之根源。究萬物之終始。其說曰。無極而太極。太極動而生陽。動極而靜。靜而生陰。靜極復動。一動一靜。互爲其根。分陰分陽。兩儀立焉。陽變陰合。……五氣順布。四時行焉。五行一陰陽也。陰陽一太極也。太極本無極也。五行之生也。各一其性。無極之真。二五之精。妙合而凝。乾道成男。坤道成女。二氣交感。化生萬物。……惟人也得其秀而最靈。形既生矣。神發知矣。五性感動。而善惡分。萬事出矣。聖人定之以中正仁義。而主靜。立人極焉。……故曰。立天之道。曰陰與陽。立地之道。曰柔與剛。立人之道。曰仁與義。又曰。原始反終。故知死生之說。大哉易也。斯其至矣。又著通書四十篇。發明太極之蘊。(宋史卷四二七周敦頤傳。)

程顥字伯淳。世居中山。後從開封徙河南。……自十五六時。與弟頤聞汝南周敦頤論學。遂厭科舉之習。慨然

有求道之志。泛濫於諸家。出入於老釋者幾十年。返求諸六經。而後得之。……教人自致知至於知止。誠意至於平天下。灑掃應對至於窮理盡性。循循有序。病學者厭卑近而驚高遠。卒無成焉。故其言曰：……昔之害近而易知。今之害深而難辨。昔之惑人也乘其迷暗。今之惑人也因其高明。自謂之窮神知化。而不足以開物成務。言爲無不周遍。實則外於倫理。窮深極微。而不可以入堯舜之道。天下之學。非淺陋固滯。則必入於此。自道之不明也。邪誕妖妄之說競起。塗生民之耳目。溺天下於污濁。雖高才明智。膠於見聞。醉生夢死。不自覺也。是皆正路之榛蕪。聖門之蔽塞。辟之而後可以入道。顯之死。……文彥博采衆論。題其墓曰明道先生。（宋史卷四二七程顥傳。）

程頤。字正叔。……胡瑗問：……學之道如何。曰。天地儲精。得五行之秀者爲人。其本也。真而靜。其未發也。五性具焉。曰仁、義、禮、智、信。形既生矣。外物觸其形而動其中矣。其中動而七情出焉。曰喜、怒、哀、樂、愛、惡、欲。情既熾而益蕩。其性鑿矣。是故覺者約其情。使合於中。正其心。養其性。……然學之道。必先明諸心。知所養。然後力行以求至。所謂自明而誠也。誠之道在乎信道篤。信道篤則行之果。行之果則守之固。仁義忠信不離乎心。造次必於是。顛沛必於是。出處語默必於是。久而弗失。則居之安。動容周旋中禮。而邪僻之心無自生矣。……頤於書無所不讀。其學本於誠。以大學語孟中庸爲標指。而達於六經。……著易、春秋傳。以傳於世。……平生誨人不倦。故學者出其門最多。……世稱爲伊川先生。（宋史卷四二七程頤傳。）

張載。字子厚。長安人。……謁范仲淹。……因勸讀中庸。載讀其書。猶以爲未足。又訪諸釋老。累年究極其說。……

：反而求之六經。……爲祁州司法參軍雲巖令。政事以敦本善俗爲先。每月吉。具酒食。召鄉人高年會縣庭。親爲勸酬。使人知養老事長之義。因問民疾苦。及告所以訓戒子弟之意。……與諸生講學。每告以知禮成性。變化氣質之道。……故其學尊禮、貴德、樂天、安命。以易爲宗。以中庸爲體。以孔孟爲法。……又論定井田宅里。發斂學校之法。皆欲條理成書。使可舉而措諸事業。……載學古力行。爲關中士人宗師。世稱爲橫渠先生。著書號正蒙。又作西銘。（宋史卷四二七張載傳。）

邵雍。字堯夫。……河南人。……北海李之才。攝其城令。聞雍好學。……乃事之才。受河圖洛書。必義八卦。六十。四卦圖像之才之傳。遠有端緒。而雍探頤索隱。妙悟神契。洞徹蘊奧。汪洋浩博。多其所自得者。……遂行必義。先天之旨。著書十餘萬言行於世。……元祐中。賜諡康節。……所著書曰。皇極經世。勸物內外篇。漁樵問對。詩曰。伊川擊壤集。（宋史卷四二七邵雍傳。）

楊時。字中立。南劍將樂人。……河南程顥與弟頤。講孔孟絕學於熙豐之際。河洛之士翕然師之。時調官不起。以師禮見顥於潁昌。……又見程頤於洛。……關西張載。嘗著西銘。二程深推服之。時疑其近於兼愛。與其師頤。辨論往復。聞理一分殊之說。豁然無疑。……四方之士。不遠千里從之游。號曰龜山先生。……既渡江。東南學者。推時爲程氏正宗。……朱熹張栻之學得程氏之正。其源委脈絡。皆出於時。（宋史卷四二八楊時傳。）

羅從彥。字仲素。南劍人。……聞同郡楊時。得河南程氏學。慨然慕之。……遂徒步往學焉。……朱熹謂龜山倡道東南。士之游其門者甚衆。然潛思力行。任重詣極如仲素。一人而已。……學者稱之曰豫章先生。（宋史卷

四二八羅從彥傳)

李侗。字愿中。南劍州劍浦人。……聞郡人羅從彥得河洛之學。遂以書謁之。……其言曰。學問之道。不在多言。但默坐澄心。體認天理。若是雖一毫私欲之發。亦退聽矣。……又曰。讀書者知其所言。莫非吾事。而卽吾身以求之。則凡聖賢所至。而吾所未至者。皆可勉而進矣。若直求之文字。以資誦說。其不爲玩物喪志者幾希。……

吏部員外郎朱松。與侗爲同門友。雅重侗。遣子熹從學。熹卒得其傳。(宋史卷四二八李侗傳)

朱熹。字元晦。一字仲晦。徽州婺源人。……家故貧。少依父友劉子羽。寓建之崇安。福建崇安縣後徙建陽福建建陽縣之

考亭。……熹少時。慨然有求道之志。父松病亟。嘗屬熹曰。籍溪胡原仲。白水劉致中。屏山劉彥冲。三人學有淵

源。吾所敬畏。吾卽死汝往事之。而惟其言是聽。三人謂胡憲。劉勉之。劉子翬也。故熹之學。旣博求之經傳。復徧交當世有識之士。延平李侗老矣。嘗學於羅從彥。熹歸自同安。不遠數百里。徒步往從之。其爲學。大抵窮理以

致其知。反躬以踐其實。而以居敬爲主。嘗謂聖賢道統之傳。散在方冊。聖經之旨不明。而道統之傳始晦。於是竭其精力。以研窮聖賢之經訓。所著書。有易本義。啓蒙。著卦考誤。詩集傳。大學中庸章句。或問。論語孟子集註。

太極圖通書西銘解。楚辭集註辨證。韓文考異。所編次有論孟集議。孟子指要。中庸輯略。孝經刊誤。小學書。通鑑綱目。宋名臣言行錄。家禮。近思錄。河南程氏遺書。伊洛淵源錄。皆行於世。熹沒。朝廷以其大學語孟中庸訓

說。立於學宮。(宋史卷四二九朱熹傳)

按宋之理學。向分濂洛關閩四派。所謂濂洛關閩者。周敦頤。程顥與弟頤。張載。朱熹。



也。周居濂溪。二程洛陽人。張載關中人。朱熹僑居建州。故云。其學說之主張。撮誌如下。

宗義案。周子之學。以誠爲本。從寂然不動處。握誠之本。故曰主「靜」立極。（黃宗義宋元學案卷一二）

唐一菴曰。明道之學。嫡衍周派。一天人。合內外。主於「敬」而行之以恕。明於庶物。而察於人倫。務於窮神知化。而能開物成務。（黃宗義宋元學案卷一四）

宗義案。明道伊川。大旨雖同。而其所以接人。伊川已大變其說。故朱子曰。明道宏大。伊川親切。大程夫子。當識其明快中和處。小程夫子。當識其初年之嚴毅。晚年又濟以寬平處。是自周元公主靜立人極開宗。明道以靜字稍偏。不若專主於敬。然亦唯恐以把持爲敬。有傷於靜。故時時提起。伊川則以敬字未盡。益之以窮理之說。而曰。涵義須用敬。進學在致知。又曰。只守一個敬字。不知集義。卻是都無事也。然。隨曰。敬以直內。義以方外。……義是敬之著。敬是義之體。……自此旨一立。至朱子又加詳焉。（黃宗義宋元學案卷一六）

橫渠先生。「精思力踐。」毅然以聖人之事爲己任。凡所議論。率多超卓。至於變化氣質。謂形而後有氣質之性。善反之。則天地之性存焉。故氣質之性。君子有弗性焉。此尤自昔聖賢之所未發。警教後學最爲切至者也。（黃震黃氏日抄卷三三）

古人所以從事於學者。其果何爲而然哉。天之生斯人也。則有常性。人之立於天地之間也。則有常事。在身有

一身之事。在家有一家之事。在國有一國之事……弗勝其事。則爲弗有其性。弗有其性。則爲弗克若天矣。克保其性而不悖其事。所以順乎天也。然則舍講學其能之哉。凡天下之事。皆人之所當爲。君臣父子兄弟夫婦朋友之際。人事之大者也。以至於視聽言動周旋食息。至纖至悉。何莫非事者。一事之不貫。則天性之陷溺也。然則講學其可不汲汲乎。學所以明萬事而奉天職也。雖然事有其理而著於吾心。心也者。萬事之宗也。惟人放其良心。故事失其統紀。學也者。所以收其放而存其良也。夏葛而冬裘。飢食而渴飲。理之所固有。而事之所當然者。凡吾於萬事。皆見其若是也。而後爲當。其可學者。求乎此而已。（黃宗羲宋元學案卷四八）

### 與朱熹同時。有陸九淵一派。與之立異。

陸九淵。字子靜……謂人曰。聞人誦伊川語。自覺若傷我者。又曰。伊川之言。奚爲與孔子孟子之言不類。近見其間多有不是處。初讀論語。卽疑有子之言支離。他日讀古書。至宇宙二字。解者曰。四方上下曰宇。往古來今曰宙。忽大省曰。宇宙內事。乃己分內事。己分內事。乃宇宙內事。又嘗曰。東海有聖人出焉。此心同也。此理同也。至西海、南海、北海有聖人出。亦莫不然。千百世之上。有聖人出焉。此心同也。此理同也。至於千百世之下。有聖人出。此心此理。亦無不同也……還鄉。學者輻湊。每開講席。戶外屢滿。耆老扶杖觀聽。自號象山翁。學者稱象山先生。嘗謂學者曰。汝耳自聰。目自明。事父自能孝。事兄自能弟。本無欠缺。不必它求。在乎自立而已。又曰。此道與溺於利欲之人言猶易。與溺於意見之人言卻難。或勸九淵著書。曰。六經註我。我註六經。又曰。學苟知道。六經皆我註腳……初九淵嘗與朱熹會鵝湖。江西鉛山縣。論辨所學。多不合……至於無極而太極之辨。則貽書

往來論難不置焉。（宋史卷四三四陸九淵傳。）

按自程頤以下。大抵主「格物」「致知」之說。至南宋朱熹。乃集此派學說之大成。陸九淵主張與朱氏不同。朱主道問學。陸主尊德性。朱以「窮理爲始事。以理已明。則可以誠意正心。」陸欲「先發人之本心。而後使之博覽。以應萬物之變。」朱以陸爲「太簡。」陸以朱爲「支離。」始終相詆而不能相容。世所謂朱陸異同是也。

### （丙）理學之變遷

古之公卿。皆自幼時便教之。以爲異日之用。（呂祖謙周禮說。）

今世之儒士。自以爲得「正心」「誠意」之學者。皆風痺不知痛癢之人也。舉一世安於君父之讎。而方低頭拱手以談性命。不知何者謂之性命乎……嘗曰。研窮義理之精微。辨析古今之同異。原心於杪忽。較禮於分寸。以積累爲工。以涵養爲正。辟面盎背。則於諸儒誠有愧焉。至於堂堂之陳。正正之旗。風雨雲雷。交發而並至。龍蛇虎豹。變現而出沒。推倒一世之智勇。開拓萬古之心胸。自謂差有一日之長。亮意蓋指朱熹呂祖謙等云。（宋史卷四三六陳亮傳。）

仁人正誼不謀利。明道不計功。此語初看極好。細看全疏闊。古人以利與人而不自居其功。故道義光明……既無功利。則道義者。乃無用之虛語爾。（葉適習學記言卷二三。）

金履祥。字吉父。婺之蘭谿人。……凡天文、地形、禮樂、田乘、兵謀、陰陽、律歷之書。靡不畢究。及壯。知向濂洛之學。事同郡王柏。從登何基之門。基則學於黃榦。而榦親承朱熹之傳者也。……會襄樊之師日急。……履祥因進牽制搆虛之策。請以重兵由海道直趨燕薊。則襄樊之師。將不攻而自解。且備敍海舶所經。凡州郡縣邑。下至巨洋別隴。難易遠近。歷歷可據以行。宋終莫能用。及後朱瑄張清。獻海運之利。而所由海道。視履祥先所上書。咫尺無異者。（元史卷一八九金履祥傳。）

按理學家之立說。多偏重修養。自朱陸好重事功。與朱熹同時友善之呂祖謙。講理學而兼治史學。教人必以致用爲事。其同受學程門之陳亮葉適。則頗詆理學而昌言事功。金履祥固傳朱子之學者。而有海道圖燕之建議。是南宋學者之思想。一變北宋理學之面目。而趨於事功。蓋因金元之逼。士大夫皆志切恢復。有以使之然也。呂陳葉皆浙東人。故後人謂之浙學或永嘉學。

（丁）理學之影響

自理學創興。人以傳道自命。故又稱爲道學。皆自以爲直接於孔門。而得其心傳者也。

其弟頤序之曰。周公沒。聖人之道不行。孟軻死。聖人之學不傳。道不行。百世無善治。學不傳。千載無真儒。無善治。士猶得以明夫善治之道。以淑諸人。以傳諸後。無真儒。則質質焉。莫知所之。人欲肆而天理滅矣。先生生於千四百年之後。得不傳之學於遺經。以興起斯文爲己任。……使聖人之道。煥然復明於世。蓋自孟子之後。一人而已。（宋史卷四二七程顥傳。）

淳祐元年正月。……詔以張周二程及熹。從祀孔子廟。黃榦曰。道之正統。待人而後傳。自周以來。任傳道之責者。不過數人。而能使斯道章章較著者。一二人而止耳。由孔子而後。曾子子思繼其微。至孟子而始著。由孟子而後。周程張子繼其絕。至熹而始著。（宋史卷四二九朱熹傳。）

### 不唯不受古經籍拘束。且發生疑義。

初安石訓釋詩書周禮既成。頒之學官。天下號曰「新義」。晚居金陵。又作字說。多穿鑿傳會。其流入於佛老。一時學者。無敢不傳習。……先儒傳註。一切廢不用。黜春秋之書。不使列於學官。至戲目爲「斷爛朝報」。（宋史卷三二七王安石傳。）

童子問曰。繫辭非聖人之作乎。曰。何獨繫辭焉。文言說卦而下。皆非聖人之作。而衆說淆亂。亦非一人之言也。（歐陽修全集卷七八易童子問三。）

又曰。今詩三百五篇。豈盡定於夫子之手。所刪之詩。容或有存於閭巷浮薄之口。漢儒取於補亡。乃定二南各十有一篇。兩兩相配。退何彼穠矣。甘棠。歸之王風。削去野有死麕。黜鄭衛淫奔之詩。又作春秋發揮。又曰。大學

致知格物章。未嘗亡。還知止章於聽訟之上。謂中庸古有二篇。誠明可爲綱。不可爲目。定中庸誠明各十一章。  
(宋史卷四三八王柏傳。)

五季風俗敗壞。廉恥掃地。宋儒專講修養。砥礪名節。有「餓死事小。失節事大」之說。媿阿之習。始爲之一變。婦人女子。夫死守節不嫁。亦自斯而盛。則爲有傷人道。明清有旌表節婦之事。流弊實多。

士大夫忠義之氣。至於五季。變化殆盡。宋之初興。范質王溥。猶有餘憾。況其他哉。藝祖首褒韓通。次表衛融。足示意嚮……真仁之世。田錫。王禹偁。范仲淹。歐陽修。唐介諸賢。以直言讜論倡於朝。於是中外縉紳。知以名節相高。廉恥相尙。盡去五季之陋矣。(宋史卷四四六忠義傳序。)

無愧於口。不若無愧於身。無愧於身。不若無愧於心。(邵雍皇極經世書。)

人之生不幸不聞過。大不幸無恥。必有恥。則可教……實勝。善也。名勝。恥也。故君子……德業有未著。則恐恐然畏人知。遠恥也。(周敦頤通書。)

按宋儒主躬行實踐。是其特長。然持論太過。論人則失之「苛刻」。論事則失之「負氣」。矯激沽名。此黨禍之所由起。至於南宋胡安國春秋傳一派。主張尊王攘夷。是又因外力壓迫。發憤而興者矣。

(戊) 理學之北傳

元初姚樞、許衡師事趙復。理學遂大盛於北方。

趙復字仁甫。德安人也。太宗乙未歲<sup>七年</sup>命太子闕出帥師伐宋德安。以嘗逆戰。其民數十萬。皆俘戮無遺。……姚樞奉詔即軍中求儒道釋醫卜士。凡儒生掛俘籍者。輒脫之以歸。復在其中。……不欲北。……樞曉以……隨吾而北。必可無他。復強從之。先是南北道絕。載籍不相通。至是復以所記程朱所著諸經傳註。盡錄以付樞。自復至燕。學子從者百餘人。……楊惟中聞復論議。始嗜其學。乃與樞謀建太極書院。……選取遺書八千餘卷。請復講授其中。復以周程而後。其書廣博。學者未能貫通。乃原義農堯舜所以繼天立極。孔子顏孟所以垂世立教。周程張朱氏所以發明紹續者。作傳道圖。而以書目條列於后。別著伊洛發揮。以標其宗旨。……又取伊尹顏淵言行。作希賢錄。……樞既退隱蘇門。乃即復傳其學。由是許衡、郝經、劉因皆得其書而尊信之。北方知有程朱之學。自復始。……復家江漢之上。以江漢自號。學者稱之曰江漢先生。(元史卷一八九趙復傳)姚樞字公茂。柳城人。後遷洛陽。少力學。……從惟中。……拔德安。得名儒趙復。始得程頤朱熹之書。……因棄官去。攜家來輝州。作家廟。別爲室。奉孔子及宋儒周敦頤等象。刊諸經惠學者。……時許衡在魏。至輝就錄程朱所註書以歸。(元史卷一五八姚樞傳)

許衡字仲平。懷之河內人也。……往來河洛間。從柳城姚樞。得伊洛程氏及新安朱氏書。益大有得。尋居蘇門。

與樞及竇默相講習。凡經傳子史禮樂名物星歷兵刑食貨水利之類。無所不講。（元史卷一五八許衡傳）  
吳澄字幼清。撫州崇仁人。……既長於經傳皆通之。……乃著孝經章句。校定易書詩春秋儀禮及大小戴記。  
……先是許文正公衡爲祭酒。始以朱子小學等書授弟子。久之漸失其舊。澄至且燃燭堂上。諸生以次受業。  
日昃退燕居之室。執經問難者接踵而至。澄各因其材質反覆訓誘之。每至夜分。雖寒暑不易也。……又嘗爲  
學者言。朱子於「道問學」之功居多。而陸子靜以「尊德性」爲主。問學不本於德性。則其敝必偏於言語  
訓釋之末。故學必以德性爲本。庶幾得之。議者遂以澄爲陸氏之學。非許氏尊信朱子本意。然亦莫知朱陸之  
爲何如也。……嘗著說曰。道之大原。出於天。神聖繼之。堯舜而上。道之元也。堯舜而下。其亨也。洙泗鄒魯其利  
也。濂洛關閩其貞也。分而言之。上古則義黃其元。堯舜其亨。禹湯其利。文武周公其貞乎。中古之統。仲尼其元。  
顏曾其亨乎。子思其利。孟子其貞乎。近古之統。周子其元。程張其亨也。朱子其利也。孰爲今日之貞乎。未之有  
也。然則可以終無所歸哉。其早以斯文自任如此。……四方之士。……來學山中者。常不下千數百人。少暇卽  
著書。……於易春秋禮記。各有纂言。盡破傳註穿鑿。以發其蘊。條歸紀敘。精明簡潔。卓然成一家言。作學基學  
統二篇。使人知學之本。與爲學之序。……又校正老子。莊子。太玄經。樂律。及八陣圖。郭璞葬書。初澄所居草屋  
數間。程鉅夫題曰「草廬」。故學者稱之爲草廬先生。（元史卷一七一吳澄傳）  
按姚許推衍朱熹之說。吳則頗融合朱陸。然元世祖籠絡漢人之政策。皆自姚許諸  
人啓之。可謂忘華夷之辨者矣。



(2) 史學

宋代史學。最爲發皇。學者多精於史學。考證與記載同重。故撰作極富。官修前史而外。國史亦有成書。南宋以後野史。若三朝北盟會編。建炎以來繫年要錄。齊東野語。四朝聞見錄諸書。皆能記當代之事。會要一體。尤能貫串一朝掌故。其風播於元明。三史體例流傳。舊聞不至放失。卽緣公私留心史事。秉筆者得有依據。非近代知古而不知今者。可得仰望也。

(甲) 正史

「唐書」

唐代屢經修撰國史。已具有規模。五季之際。歷朝加以徵集補綴。至後晉出帝時。書始告成。凡本紀二十。志三十。列傳一百五。共二百卷。所謂舊唐書者是也。

開運二年六月……監修國史劉昫、史官張昭遠等。以新修唐書紀志列傳並目錄。凡二百三卷上之。賜器帛有差。(舊五代史卷八四晉少帝紀四。)

至宋仁宗。以劉昫等所撰唐書多闕漏。命宋祁、歐陽修等重刪撰之。歷十七年而書

成。凡本紀十。志五十。表十五。列傳百五十。共二百二十五卷。世稱新唐書。

祁。字子京。……初賈昌朝建議修唐書。始令館職日供唐書所未載者二事。附於本傳。命祁與王彥臣、楊察、張方平爲修撰。又命范鎮、邵必、宋敏求、呂夏卿爲編修。而以昌朝提舉。昌朝舉王疇編修。必以爲史出衆手非是。辭之。昌朝罷相。以丁度兼領。度卒。劉沆代之。沆罷。王彥臣代之。彥臣卒。曾公亮代之。唐書初修。而彥臣以憂去。方平、察相繼出外。祁遂獨秉筆。雖外官。亦以橐自隨。久之。又命歐陽修刊修。分作紀志。劉義叟修律曆、天文、五行志。將卒業。而梅堯臣入局。修方鎮。百官表。祁與范鎮在局一十七年。王疇一十五年。宋敏求、呂夏卿並各十年。（王偁東都事略卷六五宋祁傳。）

修唐書十餘年。自守亳州。出入內外。嘗以橐自隨。爲列傳百五十卷。（宋史卷二八四宋祁傳。）  
奉詔修唐書紀志表。（宋史卷三一九歐陽修傳。）

與修唐書者。皆一時聞人。其可考者如下。

劉義叟。字仲更。澤州晉城人也。歐陽修……薦其學術該博。留修唐書。義叟強記。於經史百家。無不通曉。至於國朝典故。財賦刑名。兵械鍾律。皆知其要。其樂律星歷數術。尤過人。（王偁東都事略卷六五劉義叟傳。）

梅堯臣。字聖俞。宣城人也。……所撰唐載二十六卷。多補正舊史闕謬。乃命編修唐書。書成未奏而卒。（王偁東都事略卷一一五梅堯臣傳。）

敏求。字次道……王堯臣修唐書。以敏求習唐事。奏爲編修官……補唐武宗以下六世實錄。百四十八卷。  
(宋史卷二九一宋敏求傳。)

呂夏卿。字縉叔。泉州晉江人……學長於史。貫穿唐事。博采傳記雜說數百家。折衷整比。又通譜學。創爲世系諸表。於新唐書最有功云。(宋史卷三三一呂夏卿傳。)

趙鄰幾。字亞之。鄆州須城人……常欲追補唐武宗以來實錄。孜孜訪求遺事。殆廢寢食。會疾革。惟以書未成爲恨。至淳化中。參知政事蘇易簡。因言及鄰幾追補唐實錄事……太宗遣直史館錢熙往取其書。得鄰幾所補會昌以來日曆二十六卷。(宋史卷四三九趙鄰幾傳。)

孫甫。字之翰。許州陽翟人。少好學。日誦數千言。慕孫何爲古文章……著唐史記七十五卷。每言唐君臣行事。以推見當時治亂。若身履其間。而聽者曉然如目見之。時人言終日讀史。不如一日聽孫論也。唐史藏祕閣。  
(宋史卷二九五孫甫傳。)

陳彭年。字永年。撫州南城人……所著……唐紀四十卷。(宋史卷二八七陳彭年傳。)

趙瞻。字大觀……著……唐春秋五十卷。(宋史卷三四一趙瞻傳。)

新舊兩書。詳略互見。要爲不可偏廢。新書志較詳。五代紛亂之時。唐之遺聞往事。既無人記述。殘編故籍。亦無人收藏。雖懸詔購求。而所得無幾。故舊唐書援據較少。至宋仁宗時。則太平已久。文事正興。人間舊時記載。多出於世。故新唐書採取轉多。今第觀新書藝文志

所載。如吳兢唐書備闕記。王彥威唐典。蔣乂大唐宰相錄。凌煙功臣。秦府十八學士。史臣等傳。凌瑋唐錄政要。南卓唐朝綱領圖。薛瑒唐聖運圖。劉肅大唐新語。李肇國史補。林恩補國史等書。無慮數十百種。皆舊唐書所無者。知新書之「文省於前。而事增於舊。」有由然也。試取舊書各傳相比較。新書之增於舊書者有二種。一則有關於當日之事勢。古來之政要。及本人之賢否。所不可不載者。一則瑣言碎事。但資博雅而已。（趙翼廿二史劄記卷一七新書增舊書處。）

惟歐宋不喜駢文。刪改詔誥章疏。使一代典制不傳。是其失也。

歐宋二公。不喜駢體。故凡遇詔誥章疏四六行文者。必盡刪之……夫一代自有一代文體……今以其駢體而盡刪之。遂使有唐一代館閣臺省之文。不見於世。究未免偏見也……其他如章疏之類。有關政體治道者。或就四六改爲散文。或節其要語存之。（趙翼廿二史劄記卷一八新書盡刪駢體舊文。）

「五代史」

宋太祖命薛居正等。修梁唐晉漢周五朝史。踰年而成。凡本紀六十一。志十二。列傳七十七。共一百五十卷。所謂舊五代史者是也。

薛居正。字子平。開封浚儀人……文監修五代史。踰年畢。錫以器幣。（宋史卷二六四薛居正傳。）

其後歐陽修。私撰五代史記。凡本紀十二。列傳四十五。考二。世家年譜十。附錄三。及

目錄共七十五卷。世稱新五代史。

自撰五代史記。法嚴詞約。多取春秋遺旨。（宋史卷三一九歐陽修傳。）

新舊二史撰修之經過。傳佈之顯晦。與內容之特點。略記於下。

宋太祖開寶六年四月。詔修梁唐晉漢周書。其曰五代史者。乃後人總括之名也。七年閏十月。書成。凡一百五十卷。目錄二卷。監修者爲司空同中書門下平章事薛居正。同修者爲盧多遜、扈蒙、張澹、李昉、劉兼、李穆、李九齡。見宋史及晁公武讀書志。玉海所引中興書目。皆各本各朝實錄爲槩本。此官修之史也。其後歐陽修私撰五代史記七十五卷。藏於家。修沒後。熙寧五年。詔求其書刊行。見宋史。於是薛歐二史並行於世。至金章宗泰和七年。詔止用歐史。於是薛史漸湮。惟前明永樂大典。多載其遺文。然已割裂淆亂。非薛史篇第之舊。……開四庫館。命諸臣就永樂大典中。甄錄排纂。其缺逸者。則採宋人書中之徵引薛史者補之。於是薛史復爲完書。……今覆而案之。雖文筆迥不逮歐史。然事實較詳。蓋歐史專重書法。薛史專重敘事。本不可相無。（趙翼廿二史劄記卷二薛居正五代史。）

宋初記五代事者頗衆。歐陽得以參用之。較舊五代史固爲精核。然筆削自負。自立門目。學究氣過重。其事亦嫌缺略。不足以盡五代之事也。

范質。字文素。大名宗城人。……又述朱梁至周五代。爲通錄六十五卷。行於世。（宋史卷二四九范質傳。）

王溥。字齊物。并州祁人。……溥好學。手不釋卷。嘗集蘇冕會要及崔鉉續會要。補其闕漏。爲百卷。曰唐會要。又采朱梁至周。爲三十卷。曰五代會要。（宋史卷二四九王溥傳。）

鄭向。字公明。開封陳留人。……五代亂亡。史冊多漏失。向著開皇紀三十卷。摭拾遺事。頗有補焉。（宋史卷三〇一鄭向傳。）

子融。字熙仲。……又集五代事。爲唐餘錄六十卷以獻。（宋史卷三一〇王子融傳。）

路振。字子發。永州祁陽人。……又嘗采五代末。九國君臣行事。作世家列傳。書未成而卒。（宋史卷四四一路振傳。）

此外又有孫光憲北夢瑣言。陶岳五代史補。王禹偁五代史闕文。劉恕十國春秋。龔頴運歷圖。見於宋藝文志。及晁公武讀書志者。皆在歐公之前。足資考訂。其出自各國之書。如錢儼之吳越備史。備史遺事。湯悅之江南錄。徐鉉之吳錄。王保衡之晉陽見聞要錄。又皆流布。而徐無黨注中所引證之唐摭言。唐新纂九國志。五代春秋。鑑戒錄。紀年錄。三楚新編。紀年通譜。閩中實錄等書。又皆歐所參用者。蓋薛史第據各朝實錄。故成之易。而記載或有沿襲失實之處。歐史博採羣言。旁參互證。……卷帙雖不及薛史之半。而訂正之功倍之。文直事核。所以稱良史也。（趙翼廿二史劄記卷二一歐史不專據薛史舊本。）

「宋史」

本紀四十七。志一百六十二。表三十二。列傳世家二百五十五。凡四百九十六卷。

〔遼史〕

本紀三十。志三十一。表八。列傳四十六。凡一百十六卷。

〔金史〕

本紀十九。志三十九。表四。列傳七十三。凡一百二十五卷。

遼宋金三史。皆元人所修。遼史。至正四年三月。中書右丞相都總裁脫脫等表進。金史。至正四年十一月。中書右丞相領三史事阿魯圖等表進。宋史。至正五年十月。阿魯圖等表進。（王鳴盛蛾術編卷一〇。）

初元世祖立國史院。首命王鶚修遼金二史。宋亡。又命史臣通修三史。延祐仁宗年號天歷文宗年號之間。屢詔修之。以

義例未定。竟不能成。順帝至正三年。命托克托元史作脫脫爲都總裁。特穆爾達實元史作鐵木兒塔識張起巖。歐陽玄。呂思

誠。揭傒斯爲總裁官。修之。或欲如晉書例。以宋爲世紀。而遼金爲載記。或又謂遼立國先於宋五十年。宋南渡後。常稱臣於金。以爲不可。待制王理者。著三史正統論。欲以遼金爲北史。太祖至靖康爲宋史。建炎以後爲南宋史。一時持論不決。詔遼宋金各爲史。凡再閱歲。書成上之。舉例論贊表奏。多玄屬筆云。（續通考卷一六一 經籍考二一。）

元順帝時。命托克托等修遼宋金三史。自至正三年三月開局。至正五年十月告成。以如許卷帙。成之不及三年。……實皆有舊本。非至托克托等始修也。各朝本有各朝舊史。元世祖時。又已編纂成書。至托克托等。已屬

第二三次修輯。故易於告成耳。遼史在遼時。已有耶律儼本。在金時又有陳大任本。此遼史舊本也。金亡後。累朝實錄在順天張萬戶家。後據以修史。此金史舊本也。宋亡後。董文炳在臨安。主留事。曰國可滅。史不可滅。遂以宋史館諸記注。盡歸於元都。貯國史院。見元史董文炳傳此宋史舊本也。元世祖中統二年。王鶚請修遼金二史。詔左丞相耶律鑄。平章政事王文統監修。尋又詔史天澤亦監修。其金朝衛紹王記注已亡失。則王鶚采當時詔令。及楊雲翼等所記足成之。及宋亡。又命史臣通修三史。此元世祖時纂修三史之本也。故至正中。阿魯圖。托克托等進遼史表云。耶律儼語多避忌。陳大任詞乏精詳。世祖皇帝敕詞臣撰次三史。首及於遼。進金史表云。張柔歸金史於先。王鶚采金事於後。進宋史表云。世祖皇帝拔宋臣而列政途。載宋史而歸祕府。既編戡定之助。尋奉纂修之旨。可見元世祖時。三史俱以修訂。而元史托克托傳。并謂延祐天曆間。又屢詔修之。則不惟修之於世祖時。而世祖後。又頗有修輯矣。……其所以未有成書者。……以義例未定。……各持論不決故耳。至順帝時。詔宋遼金各爲一史。於是據以編排。而紀傳表志。本已完備。故不三年遂竣事。（趙翼廿二史劄記卷二三宋遼金三史。）

耶律儼。字若思。析津人。本姓李氏。道宗壽隆六年。……遷知樞密院事。……封越國公。修皇朝實錄七十卷。……

……又善伺人主意。妻邢氏。有美色。嘗出入禁中。儼教之曰。慎勿失上意。由是權寵益固。（遼史卷九八耶律儼傳。）

好聞字裕之。……以金源氏有天下。典章法度。幾及漢唐。國亡史作。己所當任。時金國實錄。在順天張萬戶家。



乃言於張。願爲撰述。旣而爲樂夔所阻而止。好問曰。不可令一代之跡。泯而不傳。乃構亭於家。著述其上。因名曰野史。凡金源君臣遺言往行。采摭所聞。有所得輒以寸紙細字爲紀錄。至百餘萬言。今所傳者。有中州集。及壬辰雜編若干卷。（金史卷一二六元好問傳。）

順帝至正三年。詔修遼金宋三史。命脫脫爲都總裁官。（元史卷一三八脫脫傳。）

鐵木兒塔識。字九齡。國王脫脫之子。資稟宏偉。補國子學諸生。讀書穎悟絕人。……修遼金宋三史。鐵木兒塔識爲總裁官。多所協贊云。（元史卷一四〇鐵木兒塔識傳。）

揭傒斯。字曼碩。龍興富州人。……特授翰林國史館編修官。時平章李孟監修國史。讀其所撰功臣列傳。歎曰。是方可名史筆。若他人直謄吏牘爾。……詔修遼金宋三史。傒斯與爲總裁官。……且與僚屬言。欲求作史之法。須求作史之意。古人作史。雖小善必錄。小惡必記。不然何以示懲勸。由是毅然以筆削自任。凡政事得失。人材賢否。一律以是非之公。至於物論之齊。必反覆辯論。以求歸於至當而後止。至正四年。遼史成。有旨獎諭。仍督早成金宋二史。傒斯留宿史館。朝夕不敢休。因得寒疾。七日卒。（元史卷一八一揭傒斯傳。）

張起巖。字夢臣。……詔修遼金宋三史。復命入翰林爲承旨。充總裁官。……起巖熟於金源典故。宋儒道學源委。尤多究心。史官有露才自是者。每立言未當。起巖據理竄定。深厚醇雅。理致自足。（元史卷一八二張起巖傳。）

歐陽玄。字原功。……詔修遼金宋三史。召爲總裁官。發凡舉例。俾論撰者有所據依。史官中有悻悻露才。論議

不公者。玄不以口舌爭。俟其呈稿。援筆竄定之。統系自正。至於論贊表奏。皆玄屬筆。（元史卷一八二歐陽玄傳。）

呂思誠。字仲實。平定州人。……總裁遼金宋三史。（元史卷一八五呂思誠傳。）

### （乙）通史

通史之中。以司馬光之資治通鑑。貫串古今。精博詳審。爲史家之創體。朱子綱目。不足道也。

光常患歷代史繁。人主不能遍覽。遂爲通志八卷以獻。英宗悅之。命置局祕閣續其書。至是。神宗名之曰資治通鑑。自製序授之。（宋史卷三三六司馬光傳。）

光有……資治通鑑二百九十四卷。目錄三十卷。考異三十卷。……初光患歷代史繁重。學者不能綜。況於人主。遂約戰國至秦二世。如左氏體爲通志以進。英宗命光續其書。置局祕閣。以其素所賢者劉攽、劉恕、范祖禹爲屬。凡十九年而成。神宗尤重其書。以爲賢於荀悅。親爲製敍。賜名資治通鑑。（王偁東都事略卷八七司馬光傳。）

攽。字貢父。……尤邃史學。作東漢刊誤。爲人所稱頌。司馬光修資治通鑑。專職漢史。（宋史卷三一九劉攽傳。）

劉恕。字道源。筠州人。……篤好史學。自太史公所記。下至周顯德末。紀傳之外。至私記雜說。無所不覽。上下數

千載間。鉅微之事。如指諸掌。司馬光編次資治通鑑。英宗命自擇館閣英才共修之。光對曰。館閣文學之士。誠多。至於專精史學。臣得而知者。唯劉恕耳。卽召爲局僚。遇史事紛錯難治者。輒以諉恕。恕於魏晉以後事。考證差謬。最爲精詳。……著五代十國紀年。以擬十六國春秋。又采太古以來。至周威烈王時事。史記左氏傳所不載者。爲通鑑外紀。（宋史卷四十四劉恕傳。）

祖禹。字淳甫。一字夢得。……從司馬光編修資治通鑑。在洛十五年。不事進取。書成。光荐爲祕書省正字。（宋史卷三三七范祖禹傳。）

晁氏曰。皇朝治平中。司馬光奉詔編集歷代君臣事迹。許自辟官屬。借以館閣書籍。在外聽以書局自隨。至元豐七年。凡十七年。始奏御上。上起戰國。始於周威烈王二十三年。命魏趙韓爲諸侯。下終五代。凡一千三百六十二年。又略舉事目。

年經國緯。以備檢閱。別爲目錄。參考異同。俾歸一途。別爲考異。各一編。（通考卷一九三經籍考二〇。）

公子康公休。告其友晁說之曰。此書成。蓋得人焉。史記前後漢。則劉貢父。三國歷九朝而隋。則劉道原。唐迄五代。則范淳甫。（通考卷一九三經籍考二〇。）

致堂胡氏曰。司馬公六任冗官。皆以書局自隨。……高氏緯略曰。公與宋次道書曰。某自到洛以來。專以修資治通鑑爲事。於今八年。僅了得晉宋齊梁陳隋六代以來奏御。唐文字尤多。託范夢得將諸書依年月編次爲草卷。每四丈截爲一卷。自課三日刪一卷。有事故妨廢則追補。自前秋始刪。至今已二百餘卷。至大歷末年耳。向後卷數。又須倍此。共計不減六七百卷。更須三年。方可粗成編。又須細刪。所存不過數十卷而已。其費工如

此。溫公居洛十五年。故能成此書。……一事用三四處。出處纂成。是其爲功大矣。不觀正史精熟。未易決通鑑之功績也。通鑑采正史之外。其用雜史諸書。凡二百二十二家。（通考卷一九三經籍考二〇）

李燾做資治通鑑之體。記北宋一祖八宗之事。不敢言續。自居於長編。其體既尊。事亦詳盡。誠一代鉅製。惟其書散佚。使言宋事者無可據依。深爲可惜。

李燾。字仁甫。眉州丹稜人。……博極載籍。搜羅百氏。慨然以史自任。本朝典故。尤悉力研覈。做司馬光資治通鑑例。斷自建隆。迄於靖康。爲編年一書。名曰長編。……淳熙七年。長編全書成。上之。詔藏祕閣。燾自謂此書寧失之繁。無失之略。故一祖八宗之事。凡九百七十八卷。卷第總目五卷。依熙寧修三經例。損益修換四千四百餘事。上宗謂其書無愧司馬遷。燾嘗舉漢石渠白虎故事。請上稱制臨決。又請冠序。上許之。竟不克就。……張栻嘗曰。李仁甫……長編一書。用力四十年。（宋史卷三八八李燾傳）

續通鑑長編一百六十八卷。陳氏曰。禮部侍郎眉山李燾仁父撰。長編云者。司馬公之爲通鑑也。先命其屬叢目。叢目既成。乃修長編。然後刪之以成書。唐長編六百卷。今通鑑惟八十卷耳。燾所上表。自言未可謂之通鑑。止可謂之長編。故其書雖繁蕪。而不嫌也。其卷數雖如此。而冊數至餘三百。蓋逐卷又自分子卷。或至十餘。

（通考卷一九三經籍考二〇）

袁樞因司馬光資治通鑑。分類排纂。各詳起訖。而有紀事本末之作。於史家一體之

外。自爲一體。迄今不可磨滅。

袁樞。字機仲。建之建安人。……樞常喜誦司馬光資治通鑑。苦其浩博。乃區別其事而貫通之。號通鑑紀事本末。參知政事龔茂良得其書。奏於上。孝宗讀而嘉歎。以賜東宮。及分賜江上諸帥。且令熟讀曰。治道盡在是矣。  
(宋史卷三八九袁樞傳)

通鑑紀事本末四十二卷。陳氏曰。工部侍郎袁樞機仲撰。……楊誠齋爲之序。朱子曰。……司馬溫公受詔纂述資治通鑑。然後一千三百六十二年之事。編年繫日。如指諸掌。……然一事之首尾。或散出於數百年之間。不相綴屬。讀書病之。今建安袁機仲。乃以暇日。作爲此書。以便學者。其部居門目。始終離合之間。又皆曲有微意。於以錯綜溫公之書。其亦國語之流矣。(通考卷一九三經籍考二〇)

### 元胡三省之通鑑音註。亦稱博洽。爲通鑑功臣。

胡三省資治通鑑音註一百九十四卷。資治通鑑釋文辨誤十二卷。(續通考卷一六一經籍考二一)  
胡三省。字身之。浙江天台人。博學能文章。尤篤於史學。登宋寶祐四年進士。……宋亡。隱居不仕。著資治通鑑音註。及釋文辨誤百餘卷。今行於世。其音註序曰。……是書依陸德明經典釋文。釐爲廣註九十七卷。著論十篇。自周訖五代。略敘興亡大致。以考異及所註者。散入通鑑各文之下。曆法天文。則隨目錄所書而附註焉。凡紀事之本末。地名之同異。州縣之建置離合。制度之因革損益。悉疏其所以然。若釋文之舛謬。悉改正之。別著

辨誤十二卷……其釋文辨誤序曰。通鑑釋文行世。有史炤本。有公休本。史炤本。馮時行爲之序。公休本

溫公修通

鑑公休爲檢閱文字官

刻於海陵鄉齋。前無序。後無跋。直署公休官位姓名於卷首而已。又有成都府廣都縣費氏進修

堂版行。通鑑於正文下附註。多本之史炤。間以己意附之。世人以其有註。遂謂之善本。號龍爪通鑑。要之海陵釋文。龍爪註。大同而小異。皆蹈襲史炤者也。譌謬相傳。而海陵本。乃託之公休以欺世。適所以誣玷公休。此不容不辨也。（邵遠平元史類編卷三四胡三省傳。）

鄭樵通志以通史自居。時有新論。以評泊見長。然其二十略。亦多及文獻掌故。

鄭樵。字漁仲。興化軍莆田人。好著書。不爲文章。自負不下劉向楊雄。居夾漈山。謝絕人事。久之。乃游名山大川。搜奇訪古。遇藏書家。必借留讀。盡乃去。趙鼎張浚而下。皆器之。初爲經旨禮樂文字天文地理蟲魚草木方書之學。皆有論辨。紹興十九年上之。詔藏祕府。樵歸益厲所學。從者二百餘人……授右迪功郎。禮兵部架閣。以御史葉義問劾之。改監潭州南嶽廟。給札歸鈔所著通志。書成。入爲樞密院編修官……高宗幸建康。命以通志進。會病卒……學者稱夾漈先生。（宋史卷四三六鄭樵傳。）

自序略曰。江淹有言。修史之難。無出於志。誠以志者。憲章之所係。非老於典故者。不能爲也。不比紀傳。紀以年包事。傳以事繫年。儒學之士。皆能爲之……臣今總天下之大學術。而條其綱目。名之曰略。凡二十略。百代之憲章。學者之能事。盡於此矣。其五略。漢唐諸儒所得而聞。其十五略。漢唐諸儒所不得而聞也。曰氏族略。六書略。七音略。天文略。地理略。都邑略。諡略。器服略。樂略。藝文略。校讎略。圖譜金石略。災祥略。昆蟲草木略。凡十五

略。出臣胸臆。不涉漢唐諸儒議論。曰禮略、職官略、選舉略、刑罰略、食貨略。凡前五略。雖本諸前人之典。亦非諸史之文也。（通考卷二〇一經籍考二八）

按鄭氏此書。名之曰通志。其該括甚大。卷首序論。譏訛前人。高自稱許。蓋自以爲無復遺憾矣。然夷考其書。則氏族六書七音等略。考訂詳明。議論精到。所謂出臣胸臆。非諸儒所得聞者。誠是也。至於天文地理器服。則失之太簡。……若禮及職官選舉刑罰食貨五者。……杜岐公通典之書。五者居十之八。然杜公生貞元間。故其所記述。止於唐天寶。今通志旣自爲一書。……天寶以後。則竟不復陸續。（通考卷二〇一經籍考二八）

### （丙）政史

政史名著。有馬端臨文獻通考。昔人以擬通鑑。謂爲二通。其書雖錄通典。而自具面目。綴輯宋事。尤足以補宋史之闕。

馬端臨。字貴與。江西樂平人。……宋亡不仕。著文獻通考。自唐虞至南宋。補杜佑通典之闕。二十餘年而成。其自序曰。……考制度。審憲章。博聞而強識之。固通儒事也。……是以忘其固陋。輒加考評。旁搜遠紹。門分彙別。曰田賦。曰錢幣。曰戶口。曰職役。曰征權。曰市糴。曰土貢。曰國用。曰選舉。曰學校。曰職官。曰郊社。曰宗廟。曰王禮。曰樂。曰兵。曰刑。曰輿地。曰四裔。俱俱通典之成規。自天寶以前。則增益其事迹之所未備。離析其門類之所未詳。自天寶以後。至宋嘉定末。則續而成之。曰經籍。曰帝系。曰封建。曰象緯。曰物異。則通典元未有論述。而采摭

諸書以成之者也。凡敘事則本之經史。而參以歷代會要。及百家傳記之書。信而有證者從之。乖異傳疑者不錄。所謂文也。凡論事。則先取當時臣僚之奏疏。次及近代諸儒之評論。以至名流之燕談。裨官之紀錄。凡一語一言。可以訂典故之得失。證史傳之是非者。則採而錄之。所謂獻也。其載諸史傳之紀錄而可疑。稽諸先儒之論辨而未當者。研精覃思。悠然有得。則竊以己意附其後焉。命曰文獻通考。爲門二十有四。爲卷三百四十有八。其每門著述之成規。考訂之新意。則各以小序詳之。……仁宗延祐四年。遣真人王壽衍。尋訪有道之士。至饒州路。錄其書上進。詔官爲鏤版。以廣其傳。（邵遠平元史類編卷三四馬端臨傳。）

### (3) 文學

#### (甲) 文

通行文字體裁。有古文。駢儷。制藝之區分。茲分別列叙之。

#### 「古文」

自唐末歷五代。文格卑弱。至宋初。柳開始爲古文。洙與穆修復振起之。（宋史卷二九五尹洙傳。）

國初楊億。劉筠。猶襲唐人聲律之體。柳開。穆修志欲變古。而力弗逮。廬陵歐陽修出。以古文倡。臨川王安石。眉

山蘇軾。南豐曾鞏。起而和之。宋文日趨於古矣。南渡文氣不及東都。豈不足以觀世變歟。（宋史卷四三九文

苑傳序。）



柳開。字仲塗。大名人。……既就學。喜討論經義。五代文格淺弱。慕韓愈柳宗元爲文。因名肖愈。字紹元。既而改名字。以爲能開聖道之塗也。著書自號東郊野夫。又號補亡先生。作二傳以見意。……范杲好古學。大重開文。世稱爲柳范。（宋史卷四四〇柳開傳。）

穆修。字伯長。鄆州人。……自五代文敝。國初柳開始爲古文。其後楊億、劉筠、尙聲偶之辭。天下學者靡然從之。修於是時。獨以古文稱。蘇舜欽兄弟多從之遊。修雖窮死。然一時士大夫能稱文者。必曰穆參軍。（宋史卷四四二穆修傳。）

### 柳穆提倡古文。排斥駢偶。然矯枉過正。而流於艱澀難通。

往歲士人多尙對偶爲文。穆修張景輩始爲平文。當時謂之古文。穆張嘗同造朝。待旦於東華門外。方論文次。適見有奔馬。踐死一犬。二人各記其事。以較工拙。穆修曰。馬逸有黃犬遇蹄而斃。張景曰。一犬死奔馬之下。時文體新變。二人之語皆拙澀。當時已謂之工。（沈括夢溪筆談卷一四。）

嘉祐中。士人劉幾。累爲國學第一人。驟爲怪嶮之語。學者翕然效之。遂成風俗。歐陽公深惡之。會公主文。決意痛懲。凡爲新文者。一切棄黜。時體爲之一變。歐陽之力也。有一舉人論曰。天地軋萬物茁。聖人發。公曰。此必劉幾也。戲續之曰。秀才刺。試官刷。乃以大朱筆橫抹之。自首至尾。謂之「紅勒帛」。判大紙繆字榜之。旣而果幾也。（沈括夢溪筆談卷九。）

### 自歐陽修起。法度細密。所謂古文者始盛。

尹洙。字師魯。河南人也。……博學有識度。通六經。尤深於春秋。爲文章。簡而有法。（王偁東都事略卷六四尹洙傳。）

歐陽修。字永叔。廬陵人。……幼敏悟過人。……及冠。嶷然有聲。宋興且百年。而文章體裁。猶仍五季餘習。鏤刻駢偶。澶涘弗振。士因陋守舊。論卑氣弱。蘇舜元、舜欽、柳開、穆修輩。咸有意作而張之。而力不足。修游隨。得唐韓愈遺稿於廢書篋中。讀而心慕焉。苦志探頤。……必欲并轡絕馳。而追與之並。舉進士。……調西京推官。始從尹洙游。爲古文議論當世事。迭相師友。與梅堯臣游。爲歌詩相倡和。遂以文章名冠天下。……知嘉祐二年貢舉。時士子尚爲險怪奇澀之文。號太學體。修痛排抑之。凡如是者輒黜。……場屋之習。從是遂變。……獎引後進。如恐不及。賞識之下。率爲聞人。曾鞏、王安石、蘇洵、洵子軾、轍。布衣屏處。未爲人知。修卽游其聲譽。謂必顯於世。（宋史卷三一九歐陽修傳。）

景祐初。歐陽文忠公與尹師魯。專以古文相向。而公得之自然。……超然獨鶩。衆莫能及。……於是文風一變。時人競爲模範。（朱熹三朝名臣言行錄卷二。）

修之在滁也。自號醉翁。作亭琅琊山。以醉翁名之。晚年又自號六一居士。曰吾集古錄一千卷。藏書一萬卷。有琴一張。有碁一局。而嘗置酒一壺。吾老於其間。是爲「六一」。自爲傳刻石。居穎一年而卒。（王偁東都事略卷七二歐陽修傳。）

歐氏汲引後進。於是曾王三蘇之文風行一時。

曾鞏。字子固。建昌南豐人。生而警敏。……甫冠。名聞四方。歐陽修見其文奇之。……爲文章上下馳騁。愈出而愈工。本原六經。斟酌於司馬遷。韓愈。一時工作文詞者。鮮能過也。少與王安石游。安石聲譽未振。鞏導之於歐陽修。及安石得志。遂與之異。（宋史卷三一九曾鞏傳。）

王安石。字介甫。撫州臨川人。……其屬文。動筆如飛。初若不經意。旣成。見者皆服其精妙。友生曾鞏。携以示歐陽修。修爲之延譽。（宋史卷三二七王安石傳。）

蘇洵。字明允。眉州眉山人。年二十七。始發憤爲學。歲餘舉進士。又舉茂才異等。皆不中。悉焚常所爲文。閉戶益讀書。遂通六經百家之說。下筆頃刻數千言。至和嘉祐間。與其二子軾。輒。皆至京師。翰林學士歐陽修上其所著書二十二篇。旣出。士大夫爭傳之。一時學者競效蘇氏爲文章。（宋史卷四四三蘇洵傳。）

歐陽修得洵書二十篇。大愛其文辭。以爲賈誼。劉向不過也。……父子隱然名動京師。而蘇氏文章。遂擅天下。一時學者。……皆學其文。以爲師法。以其父子俱知名。號爲老蘇。（王偁東都事略卷一一四蘇洵傳。）

蘇軾。字子瞻。眉州眉山人。……比冠。博通經史。屬文日數千言。好賈誼。陸贄書。旣而讀莊子。歎曰。吾昔有見口未能言。今見是書。得吾心矣。嘉祐二年。試禮部。方時文磔裂詭異之弊勝。主司歐陽修思有以救之。得軾刑賞忠厚論。驚喜欲擢冠多士。……後以書見修。修語梅聖俞曰。吾當避此人出一頭地。聞者始譁不厭。久乃信服。……軾與弟轍師父洵爲文。旣而得之於天。嘗自謂作文如行雲流水。初無定質。但當行於所當行。止於所不可不止。雖嬉笑怒罵之辭。皆可書而誦之。其體渾涵光芒。雄視百代。有文章以來。蓋亦鮮矣。……一時文人如

黃庭堅、晁補之、秦觀、張耒、陳師道、舉世未之識。軾待之如朋儔。未嘗以師資自予也。（宋史卷三三八蘇軾傳。）蘇轍。字子由。年十九。與兄軾同登進士科。……致仕。築室於許。號穎濱遺老。自作傳萬餘言。……性沉靜簡潔。爲文汪洋澹泊。似其爲人。不願人知之。而秀傑之氣終不可掩。其高處殆與兄軾相近。（宋史卷三三九蘇轍傳。）

南宋之文。皆不能純。唯朱熹不以文名。而文自雄奇。效法韓曾。豪無萎蕪之氣。實一大家也。

王十朋。字龜齡。温州樂清人。資穎悟。日誦數千言。及長。有文行。聚徒梅溪。受業者以百數。（宋史卷三八七王十朋傳。）

葉適。字正則。温州永嘉人。爲文藻思英發。（宋史卷四三四葉適傳。）

陳亮。字同父。婺州永康人。……爲人才氣超邁。喜談兵。論議風生。下筆數千言立就。……亮自以豪俠。屢遭大獄。歸家益厲志讀書。所學益博。（宋史卷四三六陳亮傳。）

呂祖謙。字伯恭。……自其始祖居婺州。祖謙之學。本之家庭。有中原文獻之傳。長從林之奇、汪應辰、胡憲游。既又友張栻、朱熹。講索益精。……晚年會友之地。曰麗澤書院。在金華城中。（宋史卷四三四呂祖謙傳。）

陳傅良。字君舉。温州瑞安人。……爲文章。自成一家。人爭傳誦。從者雲合。由是其文擅當世。當是時。永嘉鄭伯熊、薛季宣。皆以學行聞。而伯熊於古人經制治法。討論尤精。傅良皆師事之。而得季宣之學爲多。及入太學。與

廣漢張栻，東萊呂祖謙，友善祖謙爲言，本朝文獻相承條序，而主敬集義之功，得於栻爲多……傅良爲學，自三代秦漢以下，靡不研究，一事一物，必稽於極而後已。（宋史卷四三四陳傅良傳。）

金文大率取法蘇軾，而以金石文字擅場者爲大家。趙秉文、元好問，其尤著者也。

蔡珪，字正甫，松年子也……珪博物，且識古文奇字……朝廷稽古禮文之事，取其議論爲多。（宇文懋昭大金國志卷二八蔡珪傳。）

趙秉文，字周臣，磁州盜陽人也。幼穎悟，讀書若夙習……金自泰和大安以來，科舉之文，其弊益甚。蓋有司惟守格法，所取之文，卑陋陳腐，苟合程度而已。稍涉奇峭，卽遭黜落。於是文風大衰……秉文之文，長於辨析，極所欲言而止，不以繩墨自拘。（金史卷一一〇趙秉文傳。）

元德明，系出拔拓，魏太原秀容人……子好問……字裕之……從陵川郝晉卿學，不事舉業，淹貫經傳百家。六年而業成。下太行，渡大河，爲箕山琴臺等詩。禮部趙秉文見之，以爲近代無此作也。於是名震京師……金亡不仕，爲文有繩尺，備衆體……好問蔚爲一代宗工，四方碑板銘志，盡趨其門……晚年尤以著作自任。

（金史卷一二六元德明傳。）

元文更頹，齷不振。然紀事之文，常窺見元事。

戴表元，字帥初，一字曾伯，慶元奉化州人。七歲學古詩文，多奇語，稍長，從里師習詞賦，輒棄不肯爲……初表元閱宋季文章，氣萎齷而辭骯骯，疲弊已甚，慨然以振起斯文爲己任。時四明王應麟、天台舒岳祥，並以文學

師表一代。代表元皆從而受業焉。故其學博而肆。其文清深雅潔。化陳腐爲神奇。蓄而始發。間事摹畫。而隅角不露。施於人者多。尤自祕重。不妄許與。至元大德間。東南以文章大家名重一時者。唯表元而已。（元史卷一九〇戴表元傳。）

姚燧。字端甫。

柳城人後遷洛陽

……生三歲而孤。育於伯父樞。樞隱居蘇門。……年十三。見許衡於蘇門。十八。始受學

於長安。時未嘗爲文。視流輩所作。惟見其不如古人。則心弗是也。二十四。始讀韓退之文。試習爲之。人謂有作者風。稍就正於衡。衡亦賞其辭。……燧之學。有得於許衡。由窮理致知。反躬實踐。……爲文閎肆該洽。豪而不宕。剛而不厲。春容盛大。有西漢風。宋末弊習。爲之一變。蓋自延祐以前。文章大匠。莫能先之。……當時孝子順孫。欲發揮其先德。必得燧文。始可傳信。其不得者。每爲愧恥。故三十年間。國朝名臣世助。顯行盛德。皆燧所書。每來謁文。必其行業可嘉。然後許可。辭無溢美。又稍廣置燕樂。燧則爲之喜。而援筆大書。否則弗易得也。時高麗潘陽王父子。連姻帝室。傾貲結朝臣。一日欲求燧詩文。燧靳不與。至奉旨乃與之。……然頗恃才輕視。趙孟頫元明善輩。……所著有菴菴文集五十卷行於世。（元史卷一七四姚燧傳。）

其門人最著名者。曰袁桷。桷之文。其體裁議論一取法於表元者也。（元史卷一九〇戴表元傳。）

袁桷。字伯長。慶元人。幼學文。脫去凡近。長益留心典故。常謂宋末文縟濫。克自奮厲。希古作者。（邵遠平元史類編卷二二袁桷傳。）

馬祖常。字伯庸。世爲雍古部。居靖州天山。……父潤。同知漳州路總管府事。家於光州。祖常七歲知學。得錢卽

以市書……既長益篤於學。蜀儒張頤講道儀真。往受業其門。質以疑義數十。頤甚器之……祖常工於文章。宏瞻而精核。務去陳言。專以先秦兩漢爲法。而自成一家之言……有文集行於世。（元史卷一四三馬祖常傳）。

趙孟頫。字子昂。宋太祖子秦王德芳之後也……賜第於湖州。故孟頫爲湖州人……幼聰敏。讀書過目輒成誦。爲文操筆立就……仁宗在東宮。素知其名。及卽位。召除集賢侍講學士……拜翰林學士承旨。榮祿大夫。帝眷之甚厚。以字呼之而不名。帝嘗與侍臣論文學之士。以孟頫比唐李白。宋蘇子瞻。又嘗稱孟頫操履純正。博學多聞。書畫絕倫。旁通佛老之旨。皆人所不及……詩文清邃奇逸。讀之使人有飄飄出塵之想……前史官楊載稱孟頫之才。頗爲書畫所掩。知其書畫者。不知其文章。知其文章者。不知其經濟之學。人以爲知言云。（元史卷一七二趙孟頫傳）。

虞集。字伯生。宋丞相允文五世孫也……集與弟槃。皆受業家庭。出則以契家子從吳澄遊。授受具有源委……集學雖博洽。而究極本原。研精探微。心解神契。其經緯彌綸之妙。一寓諸文。藹然慶歷乾淳風烈。嘗以江左先賢甚衆。其人皆未易知。其學皆未易言。後生晚進。知者鮮矣。欲取太原元好問中州集遺意。別爲南州集以表章之。以病目而止。平生爲文萬篇。稿存者十二三。早歲與弟槃同闢書舍爲二室。左室書陶淵明詩於壁。題曰陶庵。右室書邵堯夫詩。題曰邵庵。故世稱邵庵先生……遊其門見稱許者。莆田陳旅。旅亦有文行世。國學諸生若蘇天爵。王守誠輩。終身不名他師。皆當世稱名卿者。（元史卷一八一虞集傳）。

楊載。字仲弘。其先居建之浦城。後徙杭。因爲杭人。少孤。博涉羣書。爲文有跌宕氣。……初吳興趙孟頫在翰林。得載所爲文。極推重之。由是載之文名。隱然動京師。凡所撰述。人多傳誦之。其文章一以氣爲主。博而敏。直而不肆。自成一言。元史卷一九〇楊載傳。

范梈。字亨父。一字德機。……梈天資穎異。所誦讀。輒記憶。……耽詩工文。用力精深。……所著詩文。多傳於世。……持身廉正。……吳澄以道學自任。少許可。嘗曰。若亨父。可謂特立獨行之士矣。爲文志其墓。學者稱文白先生

（元史卷一八一范梈傳）

揭傒斯。字曼碩。龍興富州人。……幼貧。讀書尤刻苦。晝夜不懈。……貫通百氏。早有文名。……爲文章。敘事嚴整。語簡而當。……朝廷大典冊。及元助茂德當得銘辭者。必以命焉。殊方絕域。咸慕其名。得其文者。莫不以爲榮云。（元史卷一八一揭傒斯傳）

黃潛。字晉卿。婺州義烏人。……長以文名於四方。……視弟子如朋友。未始以師道自尊。……而來學者滋益。……潛之學。博極天下之書。而約之於至精。剖析經史疑難。及古今因革制度名物之屬。旁引曲證。多先儒所未發。文辭布置謹嚴。援據精切。俯仰雍容。不大聲色。譬之澄湖不波。一碧萬頃。魚鼈蛟龍。潛伏不動。而淵然之光。自不可犯。（元史卷一八一黃潛傳）

同郡柳貫吳萊。皆浦陽人。貫字道傳。……自幼至老。好學不倦。凡六經百氏兵刑律歷數術方技異教外書。靡所不通。作文沉鬱春容。涵肆演迤。人多傳誦之。……與潛及臨川虞集。豫章揭傒斯齊名。（元史卷一八一黃